

Istraga o Bugojnu

Visoki predstavnik i OSCE izričito odbacuju optužbe od strane Dževada Mlače, načelnika općine Bugojno, koje su se pojavile u Dnevnom avazu 6. novembra 1998. godine u vezi sa specijalnom istragom koju su proveli ombudsmeni Federacije oko otuđenja državne imovine u općini Bugojno.

Ombudsmeni Federacije imaju ovlaštenje po Ustavu Federacije da štite prava i slobode svih građana, takodjer i putem preispitivanja aktivnosti bilo kojeg organa vlasti u Federaciji, uključujući i općine. Ustavna je obaveza svih zvaničnika Federacije na svim nivoima da surađuju sa ombudsmenima Federacije i da podržavaju njihove aktivnosti.

Na zahtjev OHR-a i u sklopu zajedničkih napora ombudsmena Federacije i OSCE-a, provedena je specijalna istraga oko otuđenja državne imovine u Bugojnu. OHR je pokrenuo ovu istragu kao odgovor na brojne pritužbe građana na kršenje zakona u općini Bugojno.

Izvještaj se zasniva na iscrpnoj istrazi evidencije koju vodi općina Bugojno, i daje objektivnu pravnu analizu konkretnih transakcija do kojih se došlo u ovoj općini. Po mišljenju OHR-a, istraga je provedena na visoko profesionalan način.

Na osnovu nalaza ombudsmena Federacije i OSCE-a, OHR je zatražio od javnog tužioca Srednje-bosanskog kantona da odredi odgovarajući pravni lijek kao odgovor na svaki prekršaj zakona koji se navodi u Izvještaju. Od načelnika općine, gospodina Mlače, traži se da na ovom poslu u potpunosti surađuje sa javnim tužiocem. OHR očekuje od Skupštine općine Bugojno da do adekvatnog djelovanja javnog tužioca, obustavi sve radove na odnosnim objektima.

Ombudsmeni Federacije su utvrdili da je problem korupcije i vršenje nezakonitih transakcija nad imovinom, veoma raširen na općinskom nivou širom Federacije uz veoma ozbiljne posljedice po prava pojedinaca. OHR je uputio dopis premijeru Bičakčiću i zatražio od njega da poduzme odgovarajuće korake na rješavanju ovog problema gdje god se bude pojavljivao.

OHR i OSCE ponovo podvlače svoju punu podršku ustavnoj ulozi ombudsmena Federacije. Ombudsmeni daju snažnu podršku pravima svih građana Federacije bez obzira na njihovu nacionalnost. Njihov rad predstavlja vitalan doprinos mirovnom procesu.